

清代筆記叢刊

冷廬雜識

陸以湜著

三

卷之三

三

冷廬雜識卷四

清 桐鄉陸以湑敬安著

高東谿

宋高東谿先生登。上淵聖皇帝五書。集中尚存其四。大旨皆主於任用君子。黜退小人。有云。昔漢元帝承宣帝之後。好賢不堅。惡惡不著。知蕭望之。周堪。張猛之為賢。任之。且貳而勿專。知宏。恭。石。顯之為惡。去之。且疑而勿決。卒焉小人道長。而高祖之業。自此以衰。夫元帝承宣帝之後。猶爾。況陛下承哀弊之餘。必欲振起中興之業。不能拔擢四方之君子。不能斥逐在朝之小人。日為此輩昏惑。臣恐宗社傾覆。而陛下猶不知也。臣於彼時。雖欲為陛下言之。已無及矣。臣老母年六十餘。別無兄弟侍養。而臣又不沾陛下。一命之寵。偷活歸畊。於勢當然。而乃不避斧鉞。願效愚忠者。今日之事。存亡所係。萬一陛下肯聽臣言。則我祖宗基業。可以永保無窮。而臣雖殺身破家。固已無恨矣。又云。商太甲之始即位也。不明於德。賴一伊尹。而卒能中興。唐明皇之始即位也。勵精求治。相一李林甫。而終致禍亂。今陛下始即寶位。有太甲之不明。而朝無阿衡。昧明皇之有初。而遽相林甫。臣不勝為宗廟社稷痛哭。人常以古為監。而

陛下不能以今為監。則其不明莫甚也。其辭愷切沈痛。洵能言人所不敢言。惜高宗不知信用。卒為秦檜所抑。貶黜以終。可慨也。

朱大令斷獄

朱竹君學士文正公。負天下重望。有二兄。亦皆服官。著聞於時。長名堂。官大荔縣丞。次名垣。以進士歷官濟陽長清縣令。長於斷獄。遺事詳見學士文集。節錄之。為司民牧者龜鑑焉。濟陽少婦周新嫁王巧。一月婦歸甯。而歸。明日巧死。翁媪及鄰人以巧食婦所煮粥。而遽腹痛嘔泄死也。謂婦毒夫死。訟於官。朱命以粥及所嘔者飼狗。狗不死。又召吏審巧之死無毒狀。獨齒噤。堅不可啟。視其私。則入腹中。乃趣召婦曰。死者口不啟。汝罪而寃不能明也。汝能啟其口。當為汝辨之。婦泣而前。跪啟焉。觀者皆駭。吏持銀匕入死者喉。驗毒。出以示眾。皆曰。中毒非是。朱固問婦以巧死時狀。始知其一夕三御。蚤起即飲水三器已而食粥。遂死。朱太息久之。謂翁媪及鄰眾曰。是乃死於陰淫寒疾也。顧欲坐婦毒死夫乎。皆再拜謝。扶婦去。後婦竟為巧守節。縣故獄具。有以鳥鎗取鳬雉。而火自後發。中人洞胸死者。當抵罪。朱即爭曰。此無死法。上官訶駁數四。慘死如是。而故縱耶。朱曰。律過失殺條。曰耳目所不及。思慮所不到。正載

貪射禽獸之文。知縣不能枉律斷獄。卒爭如所引。乃已。縣有役以事逮民。民死歸。即斂訖已。而訟殺之。轉輾三十年。不決。上官檄朱會所在檢骨。骨在淺土。敗柳棺中。作人曰。久疑不可檢也。朱令坎地架木。昇棺其上。弛前和。及四牆柳方。土正見。徐徐撥土。正首足嚮。竊以席。瘞坎注醢。須臾。骨如蒸狀。作人即檢訖。告曰。屍獨腦骨紫血傷。見方寸許。衆喜。謂得情。朱熟視之曰。未也。此傷處。滌可去。衆笑曰。傷三十年。入骨。豈可滌耶。朱呼水刷之。骨白無滌。而訟遂息。或曰。於錄無此法。公何以辨之。朱曰。傷者紫色。中重而外輕。若暈漸減。然此反是。是腐血汚耳。衆歎服。

大遊仙詩

沈鹿坪師之子。還浦茂才珠復。錫田茂才採晉。皆克承家學。食餼於庠。汪文端公視學吾浙。以擬曹唐大遊仙詩題試士。師時秉鐸台郡。與還浦錫田皆有作。公大稱賞。有老鳳清雛之目。師劉阮洞中遇仙子云。竹露松烟夾道蒼。忽聞人語破幽茫。花間有犬休捎幌。谷口無鶯自奏簧。隔水遙窺驚未定。迎風小立話偏長。殷勤勸進胡麻飯。不喚劉郎便阮郎。仙子洞中有懷劉阮云。準約腰支理舊裳。洞門春寂鎖愁長。碧山有約泉聲杳。紅樹無情月影茫。邂逅飛觴還是夢。侵尋坐幙復誰香。虹橋未便經

離別也對寒星望玉郎。還浦仙子洞中有懷劉阮云。漫隨金蝶化衣裳。愁比人間別
更長。黃竹歌殘雲黯淡。玉梅夢杳月微茫。泉調琴筑難為韻。花撲簾櫳祇自香。猶憶
胡麻飯初熟。加餐兩兩勸仙郎。劉阮再到天台不復見。仙子云。石上分明記會真。在
山緣隔出山塵。關心風月誇僚壻。過眼烟霞失比鄰。藤杖龍鍾空自老。桃花狼籍不
勝春。重來北隴休騰笑。身到仙源得幾人。錫田仙子送劉郎出洞云。碧雲無際是天
台。流水何曾去復來。久住不知塵世別。瀕行始惜洞門開。香分芍藥腸應斷。綠到蘿
蕪首重回。從此沃州山下路。更無人迹長莓苔。仙子洞中有懷劉阮云。嬾奏瓊簫整
羽裳。離愁更比世間長。朱欄十二春岑寂。碧宇三千路杳茫。瑤草有情空自綠。桃花
無語為誰香。遙知下界還相憶。幾度樽前喚索郎。數詩皆為時傳誦。錫田嘉慶己卯
閏作甚佳。竟不得售。投井而死。師因是悽鬱。乞病歸。還浦亦屢薦不售。未及中壽而
卒。俱可悼也。

下第詞

沈錫田戊寅下第。賦陌上桑詞。語絕悽惋。傳來一紙。魂銷頃刻。秋風過了。舊侶新儔。
半屬蘭堂蓬島。升沈異數如斯也。漫詡凌雲才藻。憶挑燈昨夜。並頭紅蕊。賺人多少。

愧劉蕡策短江淹才退五度青衫淚繞桂魄年年只恐嫦娥漸老清歌一曲憑誰訴
惹得高堂煩惱夢初迴窗外芭蕉夜雨聲聲到曉

馮侍御

吾邑馮孟亭侍御浩於乾隆戊辰科登第乾隆乙卯重赴鹿鳴宴季子鷺庭太史集
梧供職京師先為具呈掌院有云緬前事以興懷有如得雋偕後生而與齒亦可忘
年人皆傳誦之

菱塘權歌

張夢廬學博精醫理求者盈門所得金盡以賙親朋歿之日家無餘貲第積書數千

卷而已家居後珠村嘗采村中事作菱塘權歌百首茲錄其五首云村北村南盡水

鄉西塘過去又東塘扁舟到處皆秋色十里菱花冷夕陽吾鄉舊名朱村又與前朱

溪中曾產珠又名珠村漁燈三兩照漁磯網得魚蝦夜未歸柔櫓咿啞何處去過橋驚起鷺鷥

飛鷺鷥橋在村東二里英雄千古總荒萊烟樹空濛杜宇哀一片桃花紅雨裏踏青人上將墩

來將墩在村北高數十仞可登眺相傳明絳春橋畔是儂家綠樹深深酒旆斜一徑

墻陰人迹斷南風開徧紫藤花曾祖佩千公自大樹洲遷居絳春橋北今世居焉小姑一語誤鴛鴦指點孤

墳怨恨長。日暮尋芳人影散。梨花冷落野庵傍。康熙間烏鎮孔秀才慎修移家珠村

所譜不悅於姑慎修終曲承母意誓不同寢後母歿遂遊四方三十餘年卒於雲南楊氏百計迎骨歸未幾以哀死里人悲之釀錢合葬古仙菴側

內閣中書

京朝官惟內閣中書舍人進身之途最多。有以進士引見而得者。有以進士授即用

知縣後吏部揀取引見而得者。道光丙申恩科行之揀有以會試薦卷中取為明通

榜而得者。乾隆間有行之今不復舉行有以舉人考授而得者。有以召試取列優等而得者。有由舉

貢捐輸而得者。婺源王葑亭通政友亮於乾隆己丑會試列明通榜授此官。有謝友

人賀啟云。鍛羽南宮。方笑中眉無勇。擣毫東掖。忽欣除目有名。維舍人昔在中書。與

學士對稱兩制。洎乎前明伊始。降同七品之班。第因所處之清嚴。爭謂此途為華美。

天依尺五地接台三。頭銜埒於新翰林。體統超乎散進士。何期下第反得升階。未登

千佛經。敢誇出世之佛。試覽百官表。幸陪入閣之官。某學書不成。識字有數。受深恩

而逾分。蒙遠譽以過情。谷鶯上雞樹而栖。雖云大樂。野鷺占鳳池而浴。祇覺增慚。王

又有謝人惠玉如意啟。起聯云。人生幾事如意者。舉俗愛其名。君子於玉比德焉。良

工琢為器。語亦雋妙。

倒句倒字

漢書每有倒句。如更議不宜時。霍山自若。領尚書必我也。為漢患者之類是也。又多倒字。如妃后子父。論議失得。貴富舊故。嫌疑病利。病疾并兼。悅喜苦勤。懼震柔寬。思心候伺。激詭諱忌。橐草之類是也。

詩囿於習

皇甫子循訪言。關中之詩。摘燕趙之詩。厲齊魯之詩。侈河內之詩。矯楚之詩。蕩蜀之詩。澀晉之詩。鄙江西之詩。質浙之詩。嘽吳下之詩。靡此皆為習所囿也。惟有志之士能矯其失。以歸於醇耳。

曲端

曲端為張浚所殺。死非其罪。人皆惜之。然端嫉李彥仙聲績逾己。當婁宿攻陝。浚使端出鄜坊。繞其後救之。而端詭託不行。致使陝城陷沒。金人得以併力西向。不忠不義。其罪甚大。史以剛愎恃才言之。猶未足概其生平也。

麒麟

明史外國貢麒麟者甚多。阿丹國麒麟前足高九尺。後六尺。頸長丈六尺。有二短角。

牛尾鹿身。按爾雅釋獸。麇。麇身牛尾。一角。注云。角頭有肉。京房傳云。麟。麇身牛尾馬蹄。有五彩。腹下黃。高丈二。明史所言頸長如此。未見古書。且不言一角有肉。疑是別種。非真麒麟。

賀失火

韓詩外傳。晉平公藏寶之臺燒。公子晏子獨束帛而賀。柳州賀進士王參元失火書。蓋本於此。

唐宰相無謚

唐宰相多無謚者。李泌功在社稷而亦無謚。尤為缺典。

明待功臣

明待功臣之薄。甚於漢。劉文成歸後。惟棋酒度日。蓋即子房辟穀之意。然猶不免於胡惟庸之毒害。可慨也。

唐縣尉

唐舉進士第者。往往授縣尉。應舉不第。乃亦有謫官縣尉者。如賈島為長江縣尉。溫庭筠為隨州縣尉是也。考唐制。縣令有京縣令。上縣令。中縣令。下縣令。尉亦如之。京

縣尉從八品下。上縣尉從九品上。中縣尉下縣尉。皆從九品下。豈黜陟各異其地耶。
李易安朱淑真

德州盧雅雨醵使見曾作金石錄序。力辨李易安再適之誣。謂德父歿時。易安年四十六歲。又六年始為是書作跋。是時年已五十有二。匪夏姬之三少等。季隗之就木。以如是之年而猶嫁。嫁而猶望其才地之美。和好之情。亦如德父昔日。至大失所望而後悔之。又不肯飲恨自悼。輒謀謀然形諸簡牘。此常人所不肯為。而謂易安之明達為之乎。觀其游經喪亂。猶復愛惜一二不全卷軸。如護頭目。如見故人。其惓惓德父。不忘若是。安有一旦忍相背負之理。此子輿氏所謂好事者為之。或造謗如碧雲駮之類。其又可信乎。陳雲伯大令亦云。宋人小說。往往污蔑賢者。如四朝聞見錄之於朱子。東軒筆錄之於歐陽公。比比皆是。又謂去年元夜一詞。本歐陽公作。後人誤編入斷腸集。漁洋山人亦嘗辨之遂疑朱淑真為佚女。皆不可不辨。按去年元夜詞。非朱淑真作。信矣。李易安再適趙汝舟事。詳趙彥衛雲麓漫鈔。諸家皆沿其說。盧氏獨力為辨雪。其意良厚。特錄之。以俟論世者取裁焉。

明東廠二校尉

明東廠為禍之酷。自古未有。獨有二校尉。以義烈聞。其一蘇宣。大名府南樂縣人。給事中楊爵下詔獄。東廠使人更迭偵伺。積五日一報。宣至獄中。知爵晝夜梏鎖。右脛前為梏木轉磕成傷瘡。宣自起梏上木。以重瓦間合脛處。使相去寸許。自此瘡愈。復有讒宣者。下宣獄。笞五十。奪其役。爵即獄中書片紙慰宣。宣答曰。公當開廣心胸。勿以宣為念。是秋。爵放還田里。送之通州。同宿旅店。次日。各以詩贈別。繼宣者楊棟。霸州人。母病。割股調羹以進。爵與劉周二子下獄。不能自食。棟以東廠使來覘。力言於司官。得代供米物。事見萬歷間武進張按察使師繹月鹿堂文集。

秋畦公取士

先祖秋畦公。諱世琛。宰密縣時。乾隆丙午戊申。秋試分校。竭晝夜之力。悉心評閱。所取皆知名士。時稱為得人。丙午分校時。嘗賦詩云。梧井朱門落葉深。呬唔聲隔院沈沈。艱難一字頻搔首。容易三場盡愜心。噉果試回咀後味。賞琴須辨爨餘音。秋風幾樹天香動。吹向寒山老桂林。是科闈前。畢秋帆制軍。試大梁書院諸生。拔祥符方松磐方伯載豫卷冠多士。決其必售。填榜之夕。不聞唱其名。心竊訝之。及拆前五名卷。則以第四名魁其經。即公所取房首也。乃歎曰。今益信文章自有定價。而司衡鑒者。

亦煞費苦心矣。歸安朱聞填諱。

趙屏山

吾郡石門趙屏山茂才宗藩。精錢穀之學。在某大令幕中數年。某故後。遺孤尚幼。囊橐蕭然。且倉庫虧短甚多。後來者將以上聞。趙設計彌縫。復為經紀其喪。乞援於其素所識者。俾其妻孥得扶柩以歸。由是人皆義之。名譽益起。當道爭以厚禮延聘。性剛直而明敏。主人有過。必面規之。嘗謂急事緩辦。緩事急辦。二語實為幕學要訣。蓋事出倉卒。心神未定。稍一任性。即貽後悔。必慎始圖終。熟思而審處之。若微渺之事。人每忽而置之。不知積少成多。弊即自此生矣。時以為名言。道光庚子。趙在臨海縣幕。余時司鐸郡學。過從頻數。投分甚深。辛丑冬。去之茗上。作詩留別。先君子及余俱有和章。原倡云。小住山城迹似蓬。交情繾綣共春融。行踪自笑同遷客。歸計惟應伴釣翁。載月好探茗水曲。停雲悵望越天空。明年待續尋芳興。記取花開菡萏紅。先君子和云。天涯游躅轉如蓬。傾蓋歡心水乳融。醉引壺觴同傲俗。笑看杖履各成翁。余同辛丑生。百年吟席留真賞。千里歸帆指遠空。此後相思隔江樹。離愁題寄彩牋紅。余與和云。望望吟勝逐去蓬。歸程千里雪初融。酒樽樂志柴桑叟。茶竈隨身笠澤翁。驛路

正逢梅破臘。屋梁愁見月當空。何時重踐論文約。窗燭更深剪碎紅。

張八愚比部詩

吾邑張八愚比部桓。績學能文兼工詩律。乾隆庚戌會試。詩題老當益壯。朱文正公器其詩為老手。特拔之入額。詩云。天道惟貞一。人心在自強。敬為難老術。勤即永年方。質勁霜彌茂。花遲圃更香。鞍矜神采壯。鏡感鬢毛蒼。此類邱陵小。難齊日月光。戒猶思抑抑。謨益念洋洋。本是無終始。何曾有弛張。健行歸體撰。不息運乾綱。張由文安縣令。捐陞郎中。素諳刑名學。有所評論。眾皆服其公允。遂主讞稿。卒年五十有五。疾亟時。神明清朗。案頭有水仙一本。口占云。那與春光再鬪妍。羈魂一縷逼周年。誰教垂死開雙眼。得見凌波第一仙。著有海隱山房詩集。

晏元獻

晏元獻無可奈何花落去。似曾相識燕歸來二句。詩詞並見。詩為示張寺丞王校勘七律。元已清明假未開。小園幽徑獨徘徊。春寒不定斑斑雨。宿醉難禁艷艷杯。云云。游梁賦客多風味。莫惜青錢萬選才。詞為浣溪沙調。一曲新詞酒一杯。去年天氣舊亭臺。夕陽西下幾時迴。云云。小園香徑獨徘徊。元獻得上句。彌年未能對。王琪為對。

下句元獻大喜。自此辟置館職。遂躋侍從。王之才固足稱。元獻服善之雅。亦何可及耶。

破體字

朝考殿試最重書法。大要以黑光勻為主。并不可有破體字。犯此者。讀卷官票簽為識。不得在前列。乾嘉間。競尚趙松雪體。破體字亦不以為嫌。曾見嘉慶乙丑科彭狀元浚殿試卷。破體字極多。甚至惡書作惡。所書作所。今則一筆不可苟且矣。

翻用前人詩意

詩有翻用前人意者。如金昌緒打起黃鸝兒。莫教枝上啼。陳燦霖古怨則云。獨卧繡窗靜。月明宿鳥啼。不嫌驚妾夢。羨汝是雙棲。朱受新春鶯則云。任爾樓頭啼曉雨。羨人夢已到漁陽。李太白郎今欲渡緣何事。如此風波不可行。徐翔鵬則云。人道橫江惡。儂道橫江好。不是浪如山。郎船去已早。杜牧之公道世間惟白髮。貴人頭上不相饒。潘其燦則云。朝來攬明鏡。白髮感蹉跎。畢竟無公道。愁人鬢畔多。張祐人生只合死揚州。此類未能悉數也。

金史

昔人謂金史叙次明淨。勝於遼元。然如后妃傳後所載海陵私其從姊妹莎里古真。餘都。莎里古真在外為淫佚。海陵聞之大怒。謂曰。爾愛貴官。有貴如天子者乎。爾愛人才。有才兼文武似我者乎。爾愛娛樂。有豐富偉岸過於我者乎。又海陵嘗曰。餘都貌雖不揚。而肌膚潔白可愛。此等猥褻語。亦皆采述。殊失體裁。

拂珊圖

先祖秋畦公。與海鹽俞是齋先生。交最篤。曾為公畫拂珊圖。名流題詠。不乏佳作。摘錄於左。

戊子小除。陸秋畦大兄。屬予作甫里圖。戲為寫此。憶少時和友人漁父一律。并以移贈云。夷猶一櫂出蘆簑。艇子前頭坐釣翁。楊柳岸邊停急雨。栗留聲裏趁斜風。煙波閱盡江山老。夜月歌殘天地空。不是無才甘避俗。閒身愛住浪花中。是齋俞琨。

笠澤已著魯望書。釣竿更拂巢父樹。他日相逢載缺瓜。還共白蘋洲上住。多君懷抱比雪清。著屐幾兩書百城。夢遶雲川千尺水。烏篷泊處柳風輕。秋畦大兄既屬題字。復成此二絕以博一笑。朗夫弟燿。

宛宛垂楊映石灘。溪山佳處有漁竿。知君偶此成高寄。不為緇塵掉脚難。兩載深情惜我遐。一尊酒盡即天涯。送行并觸思歸興。西定橋邊日未斜。秋畦老世兄屬題拙修嵇璜

秋畦大兄。往反公車。二十載於茲。學甚富。身甚貧。而不知其寄興甚超逸。今歲庚寅春。將以先世事歸里。予勉留之。不得。適攜所為拂珊瑚圖。屬題按圖名。本取杜詩釣竿欲拂珊瑚樹句。乃不自為照。而貌天隨予其上。蓋亦自况云爾。昔天隨自號江湖散人。予懼秋畦之或將終焉也。故有落句。以志慰諷云。覲面分明笠澤翁。筆牀茶竈舊家風。人依叢碧深青裏。境在寒煙宿雨中。入海漫尋巢父逸。哦詩還比日休工。只愁催踏看花馬。便號江湖恐未同。題為秋畦大兄老同年弟趙佑。

偶然吟意在江湖。且復煙波作釣徒。四面雲山圍舴艋。一灣風露泊菰蒲。心原似水同行止。志不求魚任有無。我上秋船尋伴侶。蘋花香裏定招呼。己丑冬。題奉秋畦老先生清教。秋船馮華。

澹澹春波濯柳絲。一竿風月貌天隨。依稀陸滙溪頭路。舴艋舟中萬軸詩。題奉秋畦太年伯大人誨正。再姪震東。